

propositiones Jansenii etiam in ejusdem sensu. Quare Refractoriorum obsequiosum silentium dolosum est, & merito damnatum a Clemente XI. in Bulla, quæ incipit: *Vineam Domini Sabaoth*. At Ecclesia, & Summi Pontifices Sixtus IV., Pius V., Paulus V., Gregorius XV., Alexander VII., & Clemens XI., qui Bullas de Mysterio Conceptionis edidere, nunquam damnarunt sententiam de Conceptione in peccato originali; immo vetuerunt posse dici damnatam: ideoque diversus est casus, & proceditur ab errore damnato ad opinionem hucusque non damnatam. Quare fraudulenter, & dolose exemplum Conceptionis trahitur in favorem obstinationis, & malitiæ Jansenistarum. Immo si daretur definitio, possent emendicare aliquid suffragii ex illa; quia dicere possent: Ecclesia per multa sæcula contenta fuit de veneratione externa Mysterii, quod definivit, cui aliquando fuit licitum ei intrinsicè non adhærere.

Ne tamen in his tricis involvamus Fideles; ne, quod jam pie colitur, & celebratur ab universa Ecclesia, evanescat, & ne cultus, qui crescit in dies, minuatur, & refrigescat; quod hucusque non est factum, non fiat. Pontifices in suis Constitutionibus asserunt, hucusque negotium non esse definitum, prohibent censurari alterutram sententiam, donec definitio pronuntietur pro una, vel altera parte; ut dignoscatur in Sede Apostolica reperiri potestatem definiendi, & damnandi, quæ ad fidem, & mores attinent. Necessitate urgente, opportunitate considerata, semper definivit, quæ definienda, damnavit, quæ damnanda erant. Cum ergo clarissime demonstraverimus, definitionem petitam fieri non esse necessarium, nec expedire; ideo respondendum, deducimus supplicationi, si placuerit illi, cui parere religio est, servando sylum, quo respondetur hujusmodi libellis supplicibus: *Nihil innovandum: aut: Gaudeant imperatis.*

*Laus Deo.*